

佛說長者子六過出家經

宋三藏法師釋慧簡譯

聞如是一時婆伽婆在舍衛城祇樹給孤獨園爾時僧伽羅摩長者子乃至六過出家爲道便往至世尊所頭面禮足在一面立時僧伽羅摩長者子白世尊言願世尊聽出家學道時僧伽羅摩得出家學道時世尊告僧伽羅摩比丘汝當行二法云何爲二止觀是也僧伽羅摩比丘白佛言甚解世尊甚解如來世尊告曰我取要而說云何言甚解耶僧伽羅摩白佛言止者諸結永息觀者世尊觀一切諸法世尊告曰善哉善哉僧伽羅摩我取要說法能廣分別時僧伽羅摩比丘從佛受如此教在閑靜處而思惟此義在閑靜處思惟此義已族姓子剃除鬚髮著三法衣以信

堅固出家學道修無上梵行盡生死源梵行

已立所作已辦更不復受母胞胎時尊者僧伽羅摩便成阿羅漢果時僧伽羅摩未出家時有婦母在聞女夫出家僧伽羅摩長者子乃至七返於如來所出家學道更不習欲捨家業僕從時僧伽羅摩婦母便將女詣僧伽羅摩比丘所在前默然立再三歎息便作是語汝僧伽羅摩無義無禮不端思惟捨我女於如來所出家學道諸有舍衛城王及大臣長者婆羅門刹利見我女者悉皆迷惑莫知所在常懷敬念願與居止汝不思惟而棄我女時尊者僧伽羅摩便說偈言
此外更無要 此外亦無比 此外更無觀
善慮無過此
爾時尊者僧伽羅摩婦母語僧伽羅摩言我

女意有何咎何過乃使汝捐棄於如來所出家學道時尊者僧伽羅摩便說偈曰

惡口常誹謗 嫉妬心懷奸 瞋恚喜妄語 如來說大惡

爾時尊者僧伽羅摩婦及婦母從頭至足皆

悉觀此比丘從足至頭亦復悉觀我尊者僧

伽羅摩足便作是言願尊者懺悔我愚癡所

爲亦不別真僧伽羅摩言願妹常安隱壽命

延長時僧伽羅摩婦便語母言僧伽羅摩稱

我爲妹此必不復樂欲便語僧伽羅摩言願

尊者僧伽羅摩懺悔愚癡所爲然不別真僧

伽羅摩言願妹安隱受命延長時僧伽羅摩

婦及婦母頭面禮足遶三匝再三歎息便退

去時尊者阿難從舍衛城遙見尊者僧伽羅

摩婦及婦母見已便作是語諸妹見僧伽羅

摩不耶僧伽羅摩婦對曰見僧伽羅摩亦與

言語然我願不果時尊者阿難默然而行時

尊者阿難還自詣房收攝衣鉢澡手洗足以

尼師壇著肩上詣世尊所頭面禮足在一面

坐須更退坐以此因緣具白世尊爾時世尊

便說偈言

腐樹求萌芽 火中求水滴 水中而求火

無欲而求欲

爾時世尊告諸比丘我聲聞中第一比丘能

降伏魔所謂僧伽羅摩比丘是爾時諸比丘

聞佛所說歡喜奉行

佛說長者子六過出家經